



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 414
e – mail: info@voda.ba

Broj: **UP-1/21-1-40-046-4/23**

Datum: **24.03.2023. god.**

«Agencija za vodno područje rijeke Save» Sarajevo rješavajući po zahtjevu Općine Sanski Most za izgradnju parapetnog zida na desnoj obali rijeke Sane, na području Općine Sanski Most u naselju Gerzovo, na osnovu člana 109. stav (1) tačka 8. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 49/99 i 61/22), **donosi**

RJEŠENJE

o prethodnoj vodnoj saglasnosti

1. Podnosiocu zahtjeva, Općini Sanski Most daje se prethodna vodna saglasnost za izgradnju parapetnog zida orijentacione dužine 126 m duž desne obale rijeke Sane, odnosno produžetak već izgrađenog parapetnog zida u naselju Gerzovo, u cilju zaštite od poplava, a u postupku pribavljanja urbanističke saglasnosti.
2. Prethodna vodna saglasnost se daje na osnovu pregleda projektne i druge dokumentacije dostavljene od strane podnosioca zahtjeva, utvrđene potrebe za realizacijom predmetnih radova i pod slijedećim uslovima:
 - 2.1. Izraditi i revidovati investiciono-tehničku dokumentaciju na nivou glavnog projekta koja treba da je urađena od strane ovlaštenog pravnog lica i revidovana od strane drugog pravnog lica, oba sa „liste A” Ministarstva za poljoprivredu, vodoprivredu i šumarstvo, u skladu sa odredbama Pravilnika o uvjetima i kriterijima koje mora ispunjavati pravno lice za izradu dokumentacije na osnovu koje se izdaju vodni akti („Službene novine Federacije BiH”, broj 17/08 i 38/12).
 - 2.2. Projektnom dokumentacijom treba dati tehničko-ekonomski isplativo rješenje zaštite od štetnog djelovanja voda rijeke Sane i njenih pritoka na dionici lokaliteta naselja Gerzovo na području općine Sanski Most. Projektnom dokumentacijom treba da se obuhvati tehničko rješenje produžetka parapetnog zida na desnoj obali rijeke Sane, a projekat između ostalog treba sadržavati:
 - Situativni prikaz, razmjere 1:1000 ili detaljnije, sa ucrtanom dionicom obuhvaćenom aktivnostima izgradnje zaštitnog objekta - parapetnog zida, uređenja obale rijeke Sane na ažurnim geodetskim podlogama, uzdužnog i poprečnih profila riječnog korita urađenu na bazi geodetskih snimanja koja će se provesti za potrebe izrade ove projektne dokumentacije. Snimanje izvesti preko operativnog poligonog vlaka uz povezivanje sa državnim nivelmanom sa osiguranjem krajnjih tačaka poprečnih profila na terenu trajnim biljegama (uz položajni opis i nacrt), preko kojih će se vršiti kontrola realizacije ovih radova;
 - Tehnički opis rješenja, uz obrazloženje rješenja i pojašnjenje efekata izgradnje zaštitnog objekta – betonskog parapetnog zida obloženog kamenom, predmjer radova i odgovarajuće grafičke priloge uobičajene za nivo projekta za građenje;
 - Hidrauličke i hidrološke proračune na predmetnoj dionici rijeke Sane za određivanje nivoa pojave velikih voda 1/20, 1/50 i 1/100 godina, u prirodnom i regulisanom stanju za različite rangove pojave uključujući i usvojeni nivo zaštite od velikih voda, proračunom obuhvatiti i pojavu uspora od mostova koji se nalaze na rijeci Sani na posmatranoj dionici kao i eventualne promjene i posljedice na promjenu nivoa velikih voda na dionici uzvodno;
 - Projektom definisati dubinu temeljenja parapetnog zida i način zaštite od ispiranja i odnošenja materijala;
 - U projektnoj dokumentaciji dati rješenja uvođenja zaobalnih voda i potoka koji se pojavljuju na ovom području, sa detaljima objekata za ispuštanje zaobalnih voda, te broj, raspored i izgled, rampi i stepenica za pristup koritu i sl.;
 - Na bazi rezultata provedenih geomehaničkih istražnih radova provesti statički proračun i stabilitetne analize, te dokazati stabilnost parapetnog zida (na prevrtanje, klizanje, nosivost temeljnog tla i sl.);
 - Prilikom definiranja normalnih profila uvažiti i uslove koji se odnose prije svega na izgrađenost obale, morfologiju terena, razvojno - plansku dokumentaciju, ako postoje već izgrađeni objekti zaštite od poplava, geološki sastav korita i sl.;

- Predmjerom radova utvrditi količine materijala koji treba ukloniti (smeće, mulj, kruti otpad, pijesak, šljunak, šiblje i dr). Bilans masa uraditi na osnovu ažurnih geodetskih podloga;
 - Zahvati uređenja obale i korita trebaju se uklopiti u postojeći ambijent sa minimalnim narušavanjem prirodnog stanja koristeći u rješenju prirodne materijale;
 - Trebaju se uvažiti zahtjevi predstavnika lokalne jedinice samouprave u dijelu koji se odnosi na uklapanje u urbanističku i prostorno – plansku dokumentaciju;
 - Projektna dokumentacija treba da bude urađena na zakonski zahtijevanom nivou za ovu vrstu radova i sadrži sve opće i tehničke elemente propisane zakonodavstvom iz ove oblasti.
3. Po izradi dokumentacije iz tačke 2.1. dispozitiva ovog Rješenja, nosilac prava iz prethodne vodne saglasnosti dužan je da ovoj Agenciji podnese zahtjev za izdavanje vodne saglasnosti. Zahtjev za izdavanje vodne saglasnosti dostavlja se u skladu sa članom 8. i 19. Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH”).
- Uz zahtjev se, između ostalog, prilaže:
- Revidovana Investiciono - tehnička dokumentacija zahtijevana tačkom 2.1. ovog Rješenja,
 - Rješenje o urbanističkoj saglasnosti i okolinskoj dozvoli (ukoliko predmetna aktivnost podliježe obavezi pribavljanja iste) za predmetnu dionicu izgradnje parapetnog zida duž desne obale rijeke Sane i dokaz o riješenim imovinsko – pravnim odnosima,
 - Saglasnost nadležnog udruženja sportskih ribolovaca na termine provođenja radova na predmetnom lokalitetu,
 - Ostala dokumentacija navedena u obrascu zahtjeva za vodnu saglasnost.
4. Ukoliko nakon izdavanja prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, u roku utvrđenom u članu 111. stav 3. Zakona, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, nosilac prava iz prethodne vodne saglasnosti dužan je o nastanku tih okolnosti obavijestiti ovu Agenciju, prije podnošenja zahtjeva, odnosno obavezno navesti okolnosti u zahtjevu za izdavanje vodne saglasnosti.
5. Ovu prethodnu vodnu saglasnost korisnik Općina Sanski Most će koristiti u postupku dobijanja urbanističke saglasnosti i okolinske dozvole (ukoliko predmetna aktivnost podliježe obavezi pribavljanja iste) i ona definiše sve uslove koje projektna dokumentacija koja se podnosi u postupku dobijanja vodne saglasnosti i građevinske dozvole treba ispuniti sa aspekta voda u skladu sa Zakonom o vodama.
6. Prethodna vodna saglasnost se daje sa rokom važenja od tri (3) godine od dana pravosnažnosti ovog rješenja.

O b r a z l o ž e n j e

Općina Sanski Most putem Općinskog načelnika i nadležne službe Općine je dana 08.02.2023. godine podnijela zahtjev za izdavanje prethodne vodne saglasnosti za izgradnju objekta za zaštitu od poplava – parapetnog zida od profila P3 do profila P5 (produžetak već izgrađenog zida) na rijeci Sani, u naselju Gerzovo, Općina Sanski Most, u dužini cca 126 m, u cilju zaštite od štetnog djelovanja velikih voda.

Uz zahtjev je dostavljena i pregledana slijedeća dokumentacija:

- Statut Općine Sanski Most – ovjerena kopija broj: 07-02-138/15. od 02.11.2015. godine;
- Ovjerena Kopija uvjerenja o poreznoj registraciji, Porezna uprava Federacije BiH - Kantonalni porezni ured Bihać, od 19.10.2020. godine;
- Projekat: «Produžetak izgradnje parapetnog zida na desnoj obali Sane na lokalitetu Gerzovo u Sanskom Mostu, dionica P3 do P5» urađen od strane „IPSA Institut” d.o.o. Sarajevo, juna 2022. godine (broj ugovora: 8839/22);
- Kopija katastarskog plana broj: 15 K.O. Sanski Most I, od 01.02.2023. godine izdato od strane jedinstvenog općinskog organa Općine Sanski Most, Služba za imovinsko-pravne, geodetske poslove i katastar nekretnina;
- Original Izvoda iz prostornog plana Općine Sanski Most, vezano za izgradnju parapetnog zida na zemljištu označenom kao k.č. broj: 2059 K.O. Sanski Most I, od 22.02.2023. godine;
- Uplatnica upravno administrativne takse za izdavanje vodnog akta.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i člana 21. Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 31/15, 55/19, 41/20 i 63/22) o zahtjevu je dana 10.03.2023. godine obaviještena javnost putem obavještenja na oglasnoj ploči «Agencije za vodno područje rijeke Save» Sarajevo – ured u Bihaću, te dana 10.03.2023. godine u dnevnom glasilu „OSLOBOĐENJE“. U datom roku nije bilo pisanih izjašnjenja o predloženim aktivnostima iz zahtjeva.

Podnosilac zahtjeva je izmirio posebne troškove javnog oglašavanja u dnevnom glasilu i priložio kopiju uplatnice.

Na osnovu utvrđenog činjeničnog stanja i dostavljene dokumentacije, a u svrhu smanjenja negativnih uticaja predmetne aktivnosti na režim voda i prava na vode dodijeljena drugim korisnicima, podnosiocu zahtjeva su ovim vodnim aktom, u tački 2. dispozitiva rješenja, shodno odredbama Zakona o vodama i odredbama Pravilnika o sadržaju, obliku, uslovima, načinu izdavanja i čuvanja vodnih akata, propisani uslovi koje je dužan ispuniti prilikom izrade projektne dokumentacije koja će Investitoru biti potrebna u postupku pribavljanja vodne saglasnosti i odobrenja za građenje.

U provedenom postupku konstatovano je slijedeće:

- Aktivnost za koju je podnesen zahtjev za izdavanje prethodne vodne saglasnosti je izgradnja objekata za zaštitu od poplava u naselju Gerzovo, u dužini cca 126 m, na području općine Sanski Most;
- Izgradnjom zaštitnih vodnih objekata na predmetnoj dionici obezbjeđuje se proticajni profil, stabilizacija desne obale vodotoka Sane i sprječava štetno djelovanje voda;
- Predmetna aktivnost obrađena je projektnom dokumentacijom: Projekat, «Produžetak izgradnje parapetnog zida na desnoj obali Sane na lokalitetu Gerzovo u Sanskom Mostu, dionica P3 do P5» urađen od strane „IPSA Institut“ d.o.o. Sarajevo, juna 2022. godine;

Navedena aktivnost je planirana važećim Planom i finansijskim planom za 2023. godinu AVP rijeke Save.

Na osnovu priložene tehničke dokumentacije utvrđeno je da se u svrhu smanjenja opasnosti od nastanka šteta od poplava i šteta mogućih erozionih procesa na obalama rijeke Sane, u Sanskom Mostu, na osnovu člana 109. stav (1) tačka 8., a u vezi sa članom 111. Zakona o vodama («Službene novine FBiH», broj 70/06) i člana 17., stav (1), tačka 9. Pravilnika o sadržaju, obliku, uvjetima, načinu izdavanja i čuvanja vodnih akata («Službene novine Federacije BiH» broj 31/15), valjalo riješiti kao u dispozitivu ovog rješenja.

UPUTA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.

Obrađivač akta:

Fuad Mujagić, dipl.inž.

za **Po ovlaštenju**
Rukovodilac sektora za izdavanje
vodnih akata



Haris Ališehović, dipl.inž.građ.

Dostaviti:

- „Općina Sanski Most“, Trg Ljiljana 1., Sanski Most 79260;
- «Agencija za vodno područje rijeke Save», Sektor 30;
- AVP Sava, ISV-vodna knjiga – ovdje;
- Ⓢ Arhiva – ovdje;
- AVP Sava – Oglasna ploča